

- Accueil /
- LITINDI NA BILILINGI YA MISOLO YA BILONGI

LITINDI NA BILILINGI YA MISOLO YA BILONGI

Soki totangi Biblia na Kondimana ya Kala, tomonaka ete makambo oyo ezalaki kosilikisa mingi Nkolo Nzambe mpe kotinda ye zuwa ezalaki mabe oyo ezalaki kosalema te kati na bato ya bikólo mosusu. Te! Kasi ezalaki makambo oyo ezalaki kosalema kati na bato na Ye moko, ISRAELE, bato oyo asalaki na bango kondimana.

Yango wana mibeko zomi epesamaki kaka na bana ya Isalaele, kasi te na bato nyonso ya mokili mobimba. Boye bango nde bazalaki kozwa etumbu ya Nzambe soki babukaki mobeko moko kati na yango.

Ndakisa, mobali oyo abali mwasi na ye akoyoka zuwa te soki amoni basi mosusu bazali kosala pite; kasi soki amoni mwasi na ye moko — oyo alingaki mpe afutaki mbongo ya libala mpo na ye — azali kosala bongo, akotonda na zuwa, kanda mpe nkanda

makasi. Ndenge moko mpe Nzambe azalaki na Isalaele.

(Yeremia 3:14 — Mokanda na Bomoi)

*“Bózonga epai na ngai, bino bana batomboki, mpo ngai nazali
Nkolo na bino...”*

Na tango moko, mabe ekómaki mingi penza kati na ndako ya Isalaele. Nzambe alakisaki mosakoli Ezekiele bimonaneli ya makambo oyo ezalaki kosalema na sekele kati na bato na Ye.

Amonaki:

- bato bazali kosambela moi kati na ndako ya Nzambe,
- basusu bazali kolela Tamuzi (nzambe ya Bakaladea),
- bato bazali kosambela bikeko na sekele kati na bandako na bango,
- mpe banganga-nzambe bazali kotumba mpaka mpo na banzambe ya bapaya.

(Ezekiele 8:1-18)

Lisusu, mboka etondaki na:

- monyoko,
- kosopa makila,
- kobebisa bosambisi,
- mpe basakoli ya lokuta oyo bazalaki koloba ete kimia ezali, nzokande kimia ezalaki te.

Makambo nyonso wana esilikisaki Nzambe makasi kino ekómaki tango ya kosambisa bato na Ye.

Kasi liboso libebi eya, Nzambe akabolaka liboso bato malamumu mpe bato mabe kati na bato na Ye, mpe atiaka bango elembo (ALAMA).

Abwakaka bato te na mokili mobimba, kasi kati na bato na Ye moko — Isalaele. Bato ya mokili bazalaki déjà na kosambisama na bango.

Yango nde Ezekiele amonaki.

Ezekiele 9:1-11 (Mokanda na Bomoi)

Nkolo abengaki bato oyo bazalaki kobatela engumba mpe alobaki ete báya na bibundeli na bango ya koboma.

Mibali motoba bayaki, mpe moko kati na bango alataki bilamba ya lino mpe azalaki na ekomeli ya mokomi na loketo.

Nkolo alobaki na ye:

“Leká kati na engumba Yerusaleme mpe tia elembo na bilongi ya bato nyonso oyo bazali kolela mpe koyoka mpasi mpo na makambo nyonso ya nsɔni oyo ezali kosalema kati na yango.”

Mpe alobaki na basusu:

“Bóboma nyonso — mibange, bilenge, basi mpe bana — kasi bópusana te pene ya moto oyo azali na elembo.”

Boye babandaki na Ndako Mosantu.

Ezekiele agumbamaki mpe agangaki:

“Ee Nkolo Nzambe! okoboma bato nyonso ya Isalaele?”

Nzambe azongisaki:

“Mabe ya Isalaele mpe Yuda ezali mingi penza. Mboka etondi na makila mpe lokuta... bazali koloba ete: ‘Nkolo atiki mokili, azali komona te.’ Kasi nakoyokela bango mawa te.”

Mpe moto oyo alataki lino azongaki koloba:

“Nasali nyonso ndenge opesaki ngai mitindo.”

Etumbu oyo ekokisamaki tango bato ya Babilone bayaki koboma Yerusaleme, koboma bilenge, mibange mpe bana. Kaka ndambo moke ya bato oyo bazalaki kolela mpo na masumu nde babikaki — baoyo bazwaki elembo na molimo.

(2 Bakonzi 25:8-12; Sefania 3:11-13)

Ndenge moko mpe ezali lelo.

Mabe oyo ezali kobenda nkanda ya Nzambe eutaka te epai ya bato oyo bayebi Nzambe te, kasi kati na ndako ya Nzambe — Lingomba, kati na bakristo oyo asombaki na makila ya motuya.

Bana ya Isalaele bakanisaki ete Nzambe azali komona te makambo bazalaki kosala na sekele. Apesaki bango tango ya kobongola motema, kasi babongolaki te kino kopo ya nkanda etondaki.

Lelo mpe kati na lingomba tomonaka:

- politiki,
- kosambela bikeko (ndakisa bililingi ya basantu lokola Maria),
- masɛki mpe masano kati na lingomba,
- bapasteur balangwi masanga, basalaka pite mpe balingaka mbongo,
- moto amibengi mokristo kasi azali moto ya molunge te: lelo azali na Nzambe, lobi na mokili,
- lelo asambeli, lobi asamboli bato,

- Ielo ayembi nzembo ya Nzambe, lobi ya mokili.

Makambo wana nde etindaka zuwa ya Nzambe makasi. Ezalaki malamumu soki esalemaki epai ya moto oyo ayebi Nzambe te, kasi te epai ya moto oyo alobi ete asikolami na makila ya Kristo.

Kasi liboso Nzambe asopa nkanda na Ye, atiaka elembo liboso na bato na Ye ya sembo kati na baoyo bazali komibenga bakristo.

Bango nde Nzambe abatelaka mpo na kobikisa bango na makambo oyo ezali koya — na KONYAKOLA (Enlèvement) mpo na kokende na likoló.

Nsima, baoyo bazangi elembo bakokutana na mokolo monene mpe ya nsomo ya Nkolo.

Biblia elobi ete Noa mpe Lota bazalaki bato ya sembo oyo bazalaki kolela mpo na mabe ya mokili; yango wana Nzambe abikisaki bango na etumbu.

Mpe Yesu alobaki:

Ndenge ezalaki na mikolo ya Noa mpe Lota, ndenge moko nde ekozala na koya ya Mwana ya Moto.

Bandeko, lingomba ya lelo ezali lingomba ya suka — LAODISEA.

Emoniseli 3:14-20 (Mokanda na Bomoi)

“Nayebi misala na yo: ozali malili te mpe moto te... mpo ozali langi-langi, nakobwaka yo na monoko na ngai.

Olobi: ‘Nazali mozwi,’ kasi oyebi te ete ozali mobola, mokufi miso mpe bolumbu.

Bato nyonso nalingaka, napesaka bango etumbu mpo bábongola motema.

Tala, natelemeli ekuke mpe nazali kobeta...”

Bato oyo bazali kolobelama awa ezali te bato oyo bayebi Kristo te, kasi baoyo bamilobaka bakristo.

Ndakisa ya matiti mpe ble, mpe ya bangondo zomi — nyonso ezali kolobela bato ya lingomba.

Nkolo apesi LIKEBISI:

- ☐ Moto ya langi-langi akobwakama.
 - ☐ Ezali malamumu kozala malili to moto, kasi te kati-kati.
-

Oyo ezali tango ya kokómisa makasi libiangi mpe boyonami na yo.

Na mokili ya molimo lelo, Nkolo azali kotia elembo na bato oyo bazali kotambola na:

- bosantu,
- bopeto,
- mpe bosembo.

Bato oyo batiki makambo ya mokili mpe baponaki kosalela Nkolo kaka Ye moko.

Banga nkanda ya Nzambe oyo ezali koya.

Bongola motema sikoyo.

Bongisa bomoi na yo mpo unyangwama etikala yo te.

Nzambe apambola yo.

Share on:
WhatsApp